



觀心論疏

隋 天台沙門灌頂撰

觀心論疏



清刻龍藏佛說法變相圖

觀心論疏卷第一

隋天台沙門灌頂撰

礮一

然論有序正流通從初問佛經無量下去至四月一歲有三紙半論文並是序分從問觀自生心云何四不說下去至寂然無言說有三十六行偈是正說從今約觀一念下去有十行三字是流通分就初序分為二一問二答就問中為五意一問佛經無量二問論亦甚多三問弘法之人說說蓋世四問聽法之眾無處不有五則結問云是則法雨普潤利益無量何所見聞更何利益而欲造論者耶此之五意在於論初讀則可見今不更釋就第二答中為二一長行略答二偈中廣答就長行略答為二一者然可其二問云佛經無量論亦甚多此實如所問故論云是事共知

也二者正彈其三問爲非何者一正爲弘法者多加水乳故爲失二由弘者有過故所以聽者失真道味故復爲失三明由說者聽者有失故所以四衆轉就澆醜佛法頽毀爲此三失悲傷而欲造論意在於此也何者經云諸法寂滅相不可以言宣而今宣說者欲使物藉宣通會理而反本但佛經義隱文玄所以菩薩作論申之令稟教之徒得月忘指研心諦理故於不可說之中備宣諸法而令諸律法禪等之三師乖違聖旨非但不能光顯三寶乃更汗辱佛法故像法決疑經明三師破佛法也問三師有過耶答略各有十過法師十者一但外求文解而不內觀修心釋論云有聞文而無慧所說不應受二不融經息諍趣道但執己非他我慢自高不識見心苦

集三不遵遺囑不依念處修道不依木叉而住非佛弟子四經云非禪不慧偏慧不禪一翅一輪豈能遠運五法本無說說破貪求但名利弘宣寧會聖旨六貴耳入而口出何利於已經云如人數他寶自無一錢分七無行而宣何利於他八多加水乳無道之教教誤後生九四衆失真法利轉就澆醜十非止不能光顯亦乃破佛法也禪師十者一經云假名阿練若納衣在空閑自謂人間寶道說我等過二者恃行凌他不識戒取苦集煩惱三無慧修定盲禪無目寧出生死四不遵遺囑不依念處修道不依木叉而住非佛弟子五無慧之禪多發鬼定生破佛法死墮鬼道六名利坐禪如扇提羅死墮地獄七設證得禪即墮長壽天難八加水乳禪教授學徒紹三

塗種也九四衆不沾真法之門轉就澆醜十
非止不能光顯三寶亦乃破佛法也律師十
者一但執外律不識內戒故被淨名所呵二
執律名相諍計是非不識見心苦集三然戒
定慧相資方能進道但律不慧不禪何能進
道四弘在名譽志不存道果在三途五不遵
遺囑不依念處修道不依木又而住六執律
方便小教以爲正理而障大道七師師執律
不同弘則多加水乳八不依聖教傳授則誤
累後生九四衆不沾真法轉就澆醜十非止
不能光顯三寶亦乃破佛法也然晚生莫不
軌崇三師以爲良導師既邪而無道弟子何
能自正故經云三師破佛法也偈云大師將
涅槃慈父有遺囑四念處修道當依木又住
此一偈明釋迦慈父令四衆依四念處修道

依木又戒而住故釋論明如來臨涅槃時阿
難請問佛云如來滅後諸比丘依何道行依
何而住佛答云令依四念處修道依木又戒
而住問諸佛入道法門無量云何唯令依念
處木又二法而住耶答二法雖略而理含攝
一切法門皆盡故偏勸也今略辨二行多舍
之相者何耶四念處是慧性爲目木又戒爲
足經云目足具故能到清涼池又念處慧是
解木又之戒爲行又念處是智慧莊嚴木又
之戒是福德莊嚴又念處是般若度行是五
度又念處是觀照軌行是資成軌由是二軌
能顯真性之軌又慧是圓淨涅槃行是方便
淨涅槃由是二涅槃能顯性淨涅槃又慧是
了因行是緣因由是二因能顯正因又慧是
般若德行是解脫德由是二德能顯法身成

三德也又念處是觀照般若行是方便般若由是二般若能顯實相般若又念處是圓淨解脫行是方便解脫由是二解脫能顯性淨解脫是則念處之慧木又之戒略具十義故徧勸耳但凡夫謂身為淨言受是樂執心是常計法為我由斯四倒而起貪愛貪愛無明而有諸行乃至老死苦集浩然八萬四千煩惱火燒於五陰舍宅故法華云四面俱時燄然火起即譬四倒也若小乘觀人即觀身不淨破於淨倒觀受是苦破於樂倒觀心無常破於常倒觀法無我破於我倒則由前迷心顛倒謂身是常樂我淨故起貪愛諸煩惱今既觀知身是不淨乃至苦無我則不起貪愛無明行識乃至老死滅是則生死河傾涅槃河滿即是競共推排爭出火宅到無畏處

為是因緣勸為小行之人令依念處修道耳次明大乘念處者經云煩惱即菩提生死即涅槃然菩提涅槃之道寂寥無相非淨非穢非苦非樂非常非無常非我非無我等也而今既言生死之身即是菩提涅槃之身即是真如法界實相之體故經云不壞於身而隨一相又云觀身實相觀佛亦然一切眾生即涅槃相不復更滅斯則非枯非榮在雙樹之聞恬惓寂於二死苦矣但眾生抱慧而常夜遊寧識身中佛之知見醉無明酒豈覺衣中之寶故勸令依修大乘念處觀身非淨非穢觀受非苦非樂觀心非常非無常觀法非我非無我是則非枯非榮歸於大寂涅槃住於如來三德涅槃祕密之藏經云安置諸子祕密藏中我亦不久安住是中為是因緣令依

四念處修道耳勸依木又戒者持小乘戒則有十利功德何者一者云攝僧者此云衆衆以和爲義然雖殊方異國若同在佛法出家具戒財法悉共攝令不乖則事和也無作戒資發定慧契於無漏同歸一極即理和也二者極好攝同稟淨戒各護三業則無相惱觸即極好攝也三者僧安樂住以戒各護身口無相惱亂故僧得安樂住也四者折伏高心以戒淨故能得禪定觀解心生能伏煩惱高心也五者有慚愧得安樂住由有淨戒能發定慧內懷慚愧是得安樂住也六者未信得淨信即是內凡得假名定慧遣外凡不信也七者已信增長信進修實法空得煖頂忍等三法信解轉深也八者遮今世惱漏此則世第一法折伏道滿也九者斷後世惡從苦

忍初心訖羅漢金剛心以還真斷惑故也十者梵行久住梵之言淨亦云涅槃此是羅漢極果所作已辦也斯是持小乘戒得此十利故勸依木又住也次明持大乘戒者即是智所讚戒自在戒具足戒諸波羅蜜戒也持此者亦有十利名同前而義大別何者一攝僧即是一體三寶之僧三智與三諦理和融即是僧義智照於境無境不明即智攝於境境發於智無智不發即境攝於智境智相攝和融故名攝僧也二極好攝者智照於境攝境無不中境發於智攝智無不圓故名極好攝也三僧安樂住者三觀之智栖三諦之境境智相稱和融故名安樂住也四折伏高心人者得大乘戒能折伏三諦下惑之高心也五者有慚愧得安樂住者慚天即是慚第一義

種一

六

天愧人即是愧方便道中之人故名慚愧得安樂住也六者未信得淨信者未信諦理者令皆得明信也七者已信增長信者增進中道信也八遮今世漏者即大乘伏道滿也九斷後世惡者即斷五住惑訖金剛心十梵行久住者即是妙覺大涅槃始名極淨即梵行久住也是則持淨戒者得大乘十利之益故勸令依木又住偈云我等非佛子不念此遺囑乘緩內無道戒緩墮三途此偈去有四行半正明上法律等三師及四眾不順佛教不依念處修道不依木又戒住之過倒令佛法滅壞三寶頽毀也涅槃經云於戒緩者不名為緩於乘緩者乃名為緩然大乘戒即是乘戒急即是乘急也何以故此戒能動能出故中道大乘此乘即是戒何以故此乘即能防

非止惡故乘急即戒急也今但取三歸五戒十戒等戒不動不出為戒取能動能出念處之觀為乘共為四句然戒急得天人身戒緩得四趣身乘急能得道乘緩不得道初一句者乘急戒緩乘急故得道戒緩故墮三塗今經中明四趣身受道即其義也二戒急乘緩戒急得人天身乘緩不得道今有人天身不得道即其事也三乘急戒急今明有人天身得道即其事也四乘緩戒緩今明三塗身而不得道即其事也今明上三師及四眾不依四念處修道不依木又而住即是非佛子不念慈父囑即是第四句乘戒俱緩內則自縈毒苦外則破毀三寶令他無信故論偈云我等非佛子不念此遺囑乘緩內無道戒緩墮三途由不問觀心令他信漸薄等問此去論

何故並云不知問觀心衆行皆不成若能問觀心衆行皆成耶答般若經云般若能導五波羅蜜乃至萬行能至佛果若無般若導者萬行皆邪倒今明能問觀心者即是修般若即是修四念處圓三觀也以此觀導衆行皆正不導則邪故論從始至終皆云問觀心也問四念處身是色法云何亦是心邪答經云三界無別法唯是一心作又云心爲工畫師能畫種種五陰故皆是心爲其本也偈云烏鷄不施食豈報白鷄恩非但田不良無平等種子此一偈明不修念處之觀即是無平等種子不依木叉而住即非良田也何者夫觀大乘念處者觀生死五陰之身非枯非榮即大寂涅槃經云色解脫涅槃乃至識亦解脫涅槃若修此念處觀即是觀一切六道衆生

即是常樂我淨大涅槃具足佛之知見如常不輕圓信成就經云施城中最下乞人與難勝如來等是則豈分別是田非田可施不可施耶故念處之觀即是平等種子若不修則見生死涅槃有異凡聖有殊聖是敬田則崇仰而施凡是悲田則賤而不捨故無平等種子今取王爲譬者喻無平等種子也何者昔有國王遊戲頓乏近卧草中蛇欲螫之時有白鴉啄王令寤王旣覺已還宮仍勅諸臣令覓白鴉欲報其恩諸臣答之若專覓白鴉無田可得王但普施烏鴉即是報白鴉恩也借白鴉以喻聖人烏鴉以譬凡人王喻衆生不修念處平等種子之人也故簡悲敬兩田然凡夫內無平等種子圓觀之道居懷外則不能爲佛宣化大乘平等說法豈報佛恩又破

如來禁戒則無良田故事如偈說也偈云法
雨若不降法種必焦枯此半行明四衆無戒
慧之機聖則不應何者涅槃經云純陀自云
我今身有良田無諸荒穢唯希如來甘露法
雨雨我身田令生法芽而今四衆不依念處
修道則無慧種不依木又而住則無良田既
無種則衆生無感聖之機豈能招聖法雨之
應衆生佛性之芽何得不枯也偈云各無來
世糧失三利致苦大法將欲頽衰哉見此事
此一偈明內無善機外無聖應法種之芽又
枯是則失現未之涅槃三利之樂非但失三
利之樂乃更招三途之苦斯則法無人弘日
就頽毀苦哀哉耳爲是因緣故須造觀心論
半行結也偈云平等眞法界無行無能到若
能問觀心能行亦能到此下五行半偈明信

順佛之遺囑則是佛之眞子翻前之迷爲今
解行也言平等眞法界無行無能到者然中
道眞法界之理寂絕無相無爲無人無法非
境非智豈有人之能行法之可到者也然雖
無行無到若能研心圓修三觀念處即到究
竟涅槃之彼岸也偈云即是四念處能依木
又住乘急內有道戒急生人天此是眞佛子
不乖慈父囑天龍皆慶喜一切豈不欣此兩
偈明能問觀心者無行而行無到而到者即
是能依四念處能依木又住有念處即是乘
急內有道依木又故即是戒急生人天也是
即有行有解依教修習理是眞佛子不乖慈
父囑斯人必具自行化他之德一切天龍幽
顯必藉斯得度所以欣歡也偈云能報白鴉
恩普施烏鴉食既有好良田有平等種子法

雨應時降法種皆增長各有未來資俱獲三
利樂此兩偈明有平等種子復有好良田能
施烏鴉食能報白鴉恩也何者然佛聖人能
覺悟衆生不令爲三毒諸煩惱蛇毒所傷即
是聖人於衆生有恩如白鴉覺悟於王不爲
毒蛇所害也經云依教修行名報佛恩能助
佛宣化亦名報於聖恩而今行者依念處觀
慧依木叉而住即是依教修行名報佛恩復
能以已之行化導一切衆生即是普施烏鴉
之食能報白鴉之恩也又有戒良田有慧種
子有行有解之機種一必招聖應應則必獲利也
爲是因緣故須造觀心論十行結也偈云諸
來求法者欲聞無上道不知問觀心聞慧終
不成此下有三偈明欲求二慧不知問觀心
聞思修不成何者然圓修三觀念處實相之

慧者即知文字性離無形無相即是解脫經
云無離文字說解脫也然以文字雖有不實
故文字即是解脫雖空而不虛故亦可宣也
有無常中故文字非宣非解脫斯即文字之
境能圓生三智之觀慧以此妙慧統其神耳
者所聞音教皆成聞慧也偈云諸來求法者
欲思無上道不知問觀心思慧終不成此一
偈明思慧思者思惟文字能詮所詮皆是中
道實相然其實有所以即空故萬法不能有
其相也有其所以而假故諸法不能斷無有
其所以而中故常離二邊是則文字三諦之
理圓發三慧之思故名思慧是則思非有相
亦非無相相無相皆不可得究竟盡淨此是
境智皆不可思議名爲思慧也偈云諸來求
法者欲修無上道不知問觀心修慧終不成

種

十二

此一偈明修慧修者研修理實進趣行用以其理實雖照而寂所以云無人我無受者雖寂而照所以勤修萬善經云善惡之業不敗亡以其理實即中所以福慧不二二相不可得故經云爲福德故不住無爲爲智慧故不住有爲爲無爲皆不可得也又聞慧以十二部經爲境於文作理解也思慧文義合爲境求文取理義也修慧但以義爲境忘文取理也偈云諸來求法者勤修四三昧不知問觀心困苦無所獲此一偈釋四種三昧事如後說然四種三昧雖爲行不同皆以圓觀念處之慧爲體經云植衆德本所以六度之中般若以爲良導皆得稱波羅蜜到涅槃彼岸也今不修念處觀慧導四種三昧者雖復疲勞三業困苦無所獲也所以外道雖種種苦行

無般若導故不免三途而今無慧苦行殆不殊此經云亦不樂世間無益之苦行即其事也偈云諸來求法者多聽得言語不知問觀心未得真法樂此一偈明聽者存名執相而不虛懷不知尋理之失何者經云生生不可說乃至不生不生皆不可說諸法寂滅相不可以言宣而今方便宣者理外之辭也亦如醫方是愈病之外緣而今學者存名執相恃解陵他增長我慢不修念處內觀照顯言外之理除煩惱病是則何益於學者如尋方而不服藥何利於病者也若病必須服藥而愈學者必須內觀而得道也偈云諸來求法者修三昧得定不知問觀心盲禪無所見此一偈明無慧之禪無所見也經云非智不禪非禪不智定慧相資二輪方能遠運無慧之禪

種一

十二

豈能度生死海也何者凡夫修四禪八定釋
論皆云是長壽天難而不得道況乎徒近無
慧之定而非盲也至如二乘修觀練諸禪無
漏三昧入滅盡猶被淨名所呵云夫宴坐者
不於三界現身意猶是盲無所見也若能問
觀心修三昧定者即是首楞嚴三昧也何者
而今雖觀空而不虛鑒有而不實鑒有而不
實故照而常寂即動而常靜故不於三界現
身意也觀空而不虛即寂而常照亦是靜而
常動即不起滅定現諸威儀是則照而常寂
則非有寂而常照則非無是則非有非無非
寂非照名為中道即首楞嚴三昧也所以淨
名將圓觀首楞嚴定彈於身子宴坐不成即
是盲禪無所見也況今無慧之禪而非盲也
偈云諸來求法者欲懺悔衆罪不知問觀心

罪終難得脫此一偈明不觀心懺罪終不滅
然夫懺有三種一作法懺如律所明隨犯罪
輕重或對首作法或二十僧出罪作法法成
即云罪滅此懺違無作罪也二觀相懺如方
等法華半行半坐懺等觀見好相或空中唱
罪滅等即云罪滅此懺性罪三觀無生懺經
云端坐念實相衆罪如霜露慧日能銷除此
懺煩惱罪問此三種罪云何異答大論云如
殺草奪衆生命雖同犯波夜提罪若對首懺
時兩違無作障道罪滅而殺生之報不滅故
知殺生屬性罪不問受戒不受戒犯即得罪
殺草戒受犯罪得罪不受則無罪例餘戒亦然
故知兩罪別也煩惱罪障理之惑屬煩惱罪
是則三罪既異三懺亦別問作法懺不能滅
性罪者觀相懺亦不能滅違無作罪障耶答

勝能兼劣故無生懺例可知問作法懺出在律文觀相方法出在方等諸經可解無生懺相云何答前引普賢觀文即其事也又如淨名彈優波離云當直除滅勿擾其心所以者何彼罪性不在內不在外不在中間如其心然罪垢亦然諸法亦然不出於如如優波離心相得解脫寧有垢不波離言不也淨名云一切衆生心相無垢亦復如是妄想是垢無妄想是淨取我是垢不取我是淨一切諸法如幻化相即其相也是則不能爾者雖懺不除事如偈也偈云諸來求法者意欲離煩惱不知問觀心煩惱終不滅問此偈與前偈何異答前偈明通懺悔諸罪此偈明欲觀平常所起煩惱爲異也然木石無心則無煩惱故知由心有煩惱心爲生死之本罪垢之源今

欲脫煩惱不觀心性豈得離惑若煩惱體性是實而非虛者雖復觀照終不可離以其煩惱體相不實妄想因緣和合而有經云今我此病皆從前世妄想顛倒諸煩惱生以心惑不實故可觀離若不觀心惑之相煩惱之枝終不滅也偈云諸來求法者本欲利益他不種一知問觀心退轉令他謗諸來求法者欲與顯佛法不知問觀心退還大污損此兩偈明行化興顯欲利益他內無觀慧翻爲大損何者經云謂無慧方便縛謂菩薩住貪欲瞋恚成就衆生淨佛國土是名無慧方便縛也何以然此明內無慧除自煩惱而欲外化斯則非但衆生不成就而更增已煩惱故爲縛也何者若無內觀照明外必闇於六塵則貪財著色而今外化必涉聲塵利養利養經懷不能

不起貪愛利已利已則壞他喜捨之心所以若無內觀勸化翻爲大損如偈所說如此之失其非一也故一行半偈結云如此衆得失非偈可具陳有此諸得失無人覺悟者爲是因緣故須造觀心論偈云未代修觀心得邪定發見辯才無窮盡自謂人間寶無智者鼻嗅野狐氣衝眼舉尾共却行次第墮坑殞爲是因緣故須造觀心論前有十一行半偈明諸來求法者不知問觀心衆行皆不成此下兩行半偈明修於邪觀發於邪定辯說無窮十五無人別者然雖明九十六種道一道是正餘者皆邪故知衆邪非一實難可別自非明師智者誰能識此者乎昔曾有人修觀發得魔鬼邪定辯說則無窮盡問一切禪師法師皆不能別美其不可思議高安其位既得勝人

印可彌復自謂云世人之寶邪心轉熾唯有南岳師善能精別令其內觀照了窮檢若是好法自當明淨如燒真金若是魔邪自當滅去如偽金也因而用觀魔鬼即去去後一無所知亦如著蠱謾言多語蠱若去後病者一無言也若無智之人即謂其得陀羅尼敬貴修行次第墮三途坑也故偈云無智者鼻嗅次第墮坑殞爲是因緣故須造觀心論半行結也偈云守鼻隔安般及修不淨觀安般得四禪不免泥犁業不淨謂無學覆鉢受女飯設得隨禪生隨長壽天難爲是因緣故須造觀心論此兩偈半明事相修禪之倒也守鼻隔安般一句標修有漏四禪章門及修不淨觀一句標修無漏事禪章門守鼻隔者安心在鼻也安般者數息也以數息故能得四禪

入定但昔有比丘數息修得四禪即自謂是羅漢無復後生臨終見中陰生處即謗佛云大妄語人云羅漢無生我今那見生處因謗佛即墮地獄故偈云安般得四禪不免泥犁業昔有比丘學不淨觀少時伏心欲想不起即自謂已得羅漢後出聚落乞食見女送飯欲心即發情迷心醉仍即覆鉢受於女飯故偈云不淨謂無學覆鉢受女飯也然數息得禪設不起謗乃不墮於地獄而隨禪受生墮長壽天難故偈云設得隨禪生墮長壽天難

禪一

十六

偈云依法事法用心無慧發鬼定顯異動物心
事發壞佛法命終生鬼道九十五眷屬像法
決疑明三師破佛法為是因緣故須造觀心
論此兩偈半明事法用心之失還是上安般
數息又無理觀照明故云事法大論稱為闇
證無記有垢即四禪入定是也然夫偷法必
藉闇而行盜也經云譬如偷狗夜入人舍今
邪魔諂鬼欲偷殺行者法身慧命盜出世之
財必入無慧之禪五陰闇舍故偈云依法事法
用心無慧發鬼定然魔禪鬼定亦得一七二
七乃至無量時入定乃復有種種神異世人
見之誰言非聖者也但邪魔之法勢不得久
必當事發壞敗令人起謗不信佛法故偈云
顯異動物心事發壞佛法然自有魔鬼之禪
魔去禪亦失也自有正禪但魔鬼入中魔去

禪一

十七

禪猶在也然兩種邪鬼之禪雖異生則被其所使死則爲其眷屬邪魔雖多不出九十五種故偈云命終生鬼趣九十五眷屬也上來合三十偈所明得失亦不出三師破佛法偈云內心不爲道邪諂念名利詐現坐禪相得名利眷屬事發壞他信毀損佛正道此是扇提羅死墮無間獄爲是因緣故須造觀心論前總明三師之過此下別出三師之失先有兩行半偈明禪師過何者昔有五人相契爲求利養發心入山坐禪更互一人入於城邑告衆人言四人居山坐禪並得四禪八定證斯須舍漢等果汝可供養迭相告示遂得果心利養因爾得遂五百世墮地獄五百世爲施主之奴偈云扇提羅者即是五中之一人名也故偈云內心不爲道邪諂念名利詐現

坐禪相死墮無間獄等然今學道之人心多在此道門既久所作行業多在名利邪諂之中麤心不覺細意檢之難得出離實心爲道恐之寡也然君子非不愛財取之由道苟非其道君子不爲況但恨修道不能通神感聖逮得無生苟能有道則德建名立不求梵天梵天自至矣至則妨道翻應離之何得發心市朝之懷居於情抱而自墜也偈云說法得解脫聽法衆亦然不知問觀心如貧數他寶說者問觀心無說亦無示聽者問觀心無聞亦無得爲是因緣故須造觀心論此兩偈半明法師得失前論初已總明法師爲利弘法失真道味過如前說此中更略別明得失也然圓觀之慧潛流而說彰其神口斯則情慮虛微遊心符會說則朗其神慮辯則能遣內

惑故偈云說法得解脫也聽者內修圓觀理
爲神御潛統神耳開符響會故偈云聽法衆
亦然若苟斯理說者雖復終年聽者盡其身
壽無利於說聽故偈云不知問觀心如貧數
他寶心能內觀者終日言而無說終日聽而
無聞斯則說如幻說聽如谷響故偈云說者
問觀心無說亦無示聽者問觀心無聞亦無
得也偈云戒爲制心馬雖持五部律不知問
觀心心馬終不調律住持佛法解外不解內
淨名呵上首乃名真奉律爲是因緣故須造
觀心論此兩偈半明律師之得失也然佛初
於寂滅道場成等覺爲大根大行制戒則說
十重四十八輕正防意地故心爲戒體也次
爲小根小行制戒則說二百五十戒或止防
七支作法發無作戒因以無作而爲戒體欲

引接小根漸悅之者故說小戒耳法華云始
見我身聞我所說即便信受入如來慧除先
修習學小乘者我今亦令得入佛慧始見即
華嚴入如來慧也漸入即三藏中歷五味於
法華入佛慧也故知五部之律是小乘方便
之一藏也然心是生死涅槃之本萬物之源
所以大乘之戒正防意地制伏心馬今學律
之師不尋佛之本意而但存執方便之戒以
爲正道不研心念處觀行制心終竟不得還
源本淨使心馬調也然七支是外防意地是
內防波離解外而不解內故被淨名所彈今
之律者內外通達恐之少也豈能是住持佛
法之人者乎偈云誦經得解脫非爲世財利
若能問觀心破一微塵中出大千經卷受持
讀誦此聞持無遺忘心開得解脫爲是因緣

故須造觀心論此兩偈半明誦經得失何者然佛於不可說而假宣者欲示衆生病之源本治病之妙方而勸讚四衆令勤誦者使數宣於口數聞於耳數統神心數服良藥除煩惱病解脫生死非令讀誦擬贊齋供之利故偈云誦經得解脫非爲世財利經云破微塵出大千經卷即是心塵出大千經也舊云經者外國稱修多羅名舍五義也今明心是修多羅具舍十五義不可翻也何者舊云一法本今云教本義本行本也然夫法本何得過心經云三界無別法唯是一心作談生死涅槃之教則心是教本也生死涅槃之義亦即心是本宣生死涅槃之行亦即心是本故知心舍三法之本也舊云二舍微發今云教微發義微發行微發也微發者從微至大即微

發之義而今心者有教行義三事之微發也舊云三舍涌泉今云教涌泉義涌泉行涌泉今心能流出三法無盡故譬涌泉無竭舊云四舍繩墨者截愛見之邪也今云教截邪義截邪行截邪即繩墨義也何者心正故語正即心教截邪心正故義正即心義截邪心正故行正即心行截邪也舊云五舍結髮結者如結華髮令不零落也今云心教行義三結髮使不零落故知其心舍十五義不可翻且置不論也心經明矣是則能觀心塵即空出聲聞法藏觀心即假出菩薩法藏觀心即中出諸佛法藏斯則三種法藏何經不收何論不攝即心具八萬四千法藏持誦研修觀心經者有何遺忘是則觀經內流明朗統御情慮使心開解脫煩惱也偈云勸化修供養興

顯安行人密心爲自利倚託以資身壞他喜
捨善駝驢以償人若能問觀心即如駝驢也
由是因緣故須造觀心論前有二偈半明欲
興顯佛法翻爲汙損就通方行人也此兩
偈半正明知事得失然自非內有明解觀行
知因識果畏罪憚業誓能無利已者耳觀智
觀心知萬法幻化何物可貪何身可爲雖如
幻化因果不差盜至於五如斷多羅樹佛法
死人不預僧數顯則人天所惡冥則幽聖所
呵現則色心摧折末則駝驢償人一失人身
萬劫不復侵利極微受報極重何有觀智之
人而爲斯也至如駝驢終無利已侵衆之失
也偈云諸道各有法了不自尋研忽窺窬釋
教動經十數年非但彼法拙必有謀壞心此
則迦毗梨仙聖豈聽然爲是因緣故須造觀

心論此兩偈半明外道之得失也然外道窺
窬釋教不出二意一者賤其法拙二者謀壞
佛法窺窬覓過事非好心而尋佛教也昔外
道難破一切法師唯無奈一禪師何其毋勸
云汝若將禪師論者罵驢馬頭一切諸獸之
頭即可得勝外道遂隨其毋計得勝後受迦
毗梨之身一身而有千頭既運惡心冥聖豈
聽也事如偈說偈云富貴而無道多增長憍
逸若能問觀心得真法富貴雖高而不危雖
滿而不溢不著世富貴心常在道法爲是因
緣故須造觀心論此兩偈半明富貴得失何
者夫富貴不與憍奢而憍奢自至故偈云富
貴而無道多增長憍逸若能問觀心而觀實
相境境發於妙智即是種性貴也而實相境
智具足七聖之財乃至具足萬德萬行稱之

爲富也法華云有大長者其家大富即其義也
也得此富貴之道居懷流乎其體者即如偈
雖高而不危雖滿而不溢不著世富貴心常
在道法等也偈云貧賤多姦諂窺窬造眾惡
現被王法治死墮三惡道若能問觀心即安
貧養道有道即富貴無爲即富樂爲是因緣
故須造觀心論此兩偈半明貧者得大也何
者若內無觀慧之道照朗心胸情抱則闇以
心闇故不識生死涅槃世間出世間之因果
也而復爲貧窮飢寒所逼而遂窺窬姦諂造
惡故偈云現被王法治死墮於地獄若有觀
智之心即識徃因達今世之報不更造惡招
將來之苦但安神養道故偈云有道即富貴
無爲即富樂也偈云四眾皆佛子無非是法
親因執善法諍遂結未來怨若能問觀心和

合如水乳皆師子之子悉是梅檀林爲是因
緣故須造觀心論此兩偈半明三師各執所
弘之法而相是非遂結未來重怨論初已略
出其過然外道各執所計是故云是事實餘
盡妄語是則有衆多究竟之道故是邪也而
今佛法唯一實相印之一道故經云唯一究
竟道無衆多究竟故經云雖示種種道其實
爲一乘而今諸師不取所詮之一道共出生
死昏衢法侶之親但執能詮種種之道共相
是非遂結重怨何愚之甚故偈云遂結未來
怨也非但自空失一生妄縈毒苦復誤學徒
失於慧目師弟皆同外道矣故云諸論各異
端修行理無二執者有是非達者無違諍故
諸師是執而不達也若能觀心實相修乎一
道四眾無非法親事如偈說也偈云年衰身

卷

三

帶疾眼闇耳漸聾心昏多忘漏年不如一年
死王金翅鳥不久吞命根一旦業繩斷氣絕
豈能言爲是因緣故須造觀心論此兩偈半
明師自唱涅槃時至也然從論初至于今說
猶屬序分雖未正說深義而先明三師四衆
諸有得失言方雖復淺近而是即事所行之
要行道家之大障而今行者識此諸失知過
必改者可謂真行道人雖未證無生而無生
不遠也然二萬燈明佛一期將竟而說法華
即入涅槃釋迦亦爾特更別爲一緣而說涅
槃今之大師一期隨緣異說不同今將欲涅
槃故撮要說其一論何者是論始終唯令觀
心者只爲心是如來藏具足一切佛法而衆
生不覺內衣有無價寶珠今論正示衆生心
中寶藏佛之知見示悟衆生與法華無別故

今唱衰老即是欲入涅槃所以說此論竟即
歸真滅度更無言也稽首十方佛下有四行
偈明歸請何者夫欲造論必須歸三寶加威
建立偈云稽首十方佛深慈觀心者勸善諦
觀察發正覺妙樂此一偈歸請於佛然三寶
者皆具足四無量心但慈能與樂佛慈最重
故請與樂也偈云稽首十方法深悲觀心者
勸善諦觀察得真法免苦然悲能拔苦而法
寶是真妙藥體能救苦故請法深悲觀心者
免苦也偈云稽首十方僧若能善觀察入大
和合海歡喜心無量然僧名和合即是隨喜
不乖之義故就僧論歡喜也偈云稽首龍樹
師願加觀心者令速得解脫亦加捨三心然
龍樹正破執除見而興故請龍樹加捨慈悲
喜之三心見愛之著也又宗本於龍樹故請

贊

三四

加也偈云今承三寶力下一行明已歸命三寶竟今當承三寶之力起三十六問然三十六問明義略周故有三十六也若隨緣對事辯問則不可數也偈云若觀一念心下一行明若能觀一念心能答此問當知心眼則開得入清涼池也偈云不能答此問下一行明迷惑者不能答問也哀哉末法中下一行傷嘆明末法無行道入設有三數寧別是問故傷嘆也偈云故生悲愍心下一行明恐畏後生或有能解者故起悲心作此觀心論令觀者開朗也願諸見聞者下一行明誠勸令莫疑謗何者而法華略說中恐生疑謗故三止不說止其毀謗非但不能得解復增其重罪後廣說中雖嚴誠勸五千之流猶從座起不信佛言今將欲開於論端畏物疑謗故預先

誠勸也問曰下有十三長行四字重問造論正為何人即答意明不為二人而為二人言不為二人者一則文字外學如貧數他寶但貴耳入口出未常研心內觀斯亦未足可論圓道也二則設得四禪八定者亦全未識佛法況初心安般數息何可共論妙道乎而今言為二人者一則坐禪得定發解辯說無窮自謂人間之寶今作此問不能答者何者未得謂得未證謂證墮增上慢也二則為相隨學徒不知內心求道外著文字負經論而浪行空無所獲而不知破一微塵出大千經卷為斯二人而造論也 觀心論疏卷第一

音釋

誑疏臻切 恬愜徒覽切 愜愜徒覽切 恬愜徒覽切 齧施隻切
衆也 愜愜徒覽切 愜愜徒覽切 愜愜徒覽切 愜愜徒覽切 愜愜徒覽切
齧 齧施隻切 齧施隻切 齧施隻切 齧施隻切 齧施隻切
齧 齧施隻切 齧施隻切 齧施隻切 齧施隻切 齧施隻切